

Museo Arqueologico di Aruba ta cumpli 30 aña



E conmemoracion di e aniversario aki lo consisti di un programacion varia durante 2012 y lo inclui exposicionnan temporario, publicacionnan nobo, actividadnan pa publico y ehecucion di algun proyecto specifico riba tereno di maneho. Ehempelnan di e proyectonan specifico aki ta creacion di e Fundacion Museo Arqueologico Nacional, e declaracion di e prome sitionan arqueologico como monumentonan nacional protegi y un excavacion di emergencia na Santa Cruz.

Riba e kalender di actividad, cual lo ser publica na januari 2012, lo tin entre otro apertura di un exposicion di e hallazgo di Boca di Brik y publicacion di resultadonan di esaki. Lo ricibi Dr. Weildler Guerra, antropologo Wayu y Director di e Banco de la Republica na Guajira y Museo lo ta anfitrión di e prome 'think tank' cu 'stakeholders' nan local y internacional pa planea un exposicion cu lo circula den paisnan di Reino y regio.

Pa 30 aña tanto e publico local como e bishitante internacional por a disfruta di e coleccion y informacion di nos antepasadonan Amerindio den Museo. Dia 20 di December 2011 Museo Arqueologico Nacional Aruba lo presenta e historia tras di esaki cu e complemento di un Time-line riba su website. Ta invita tur persona pa subi e website www.namaruba.org y klik riba e link Timeline.

Museo Arqueologico Aruba ta felicita y gradici un y tur cu den transcurso di e añanan na un of otro manera a aporta y a sostene Museo y ta hopi orguyoso di Fransisco 'Fan' Croes cu pa 28 aña a duna ehempel di esaki. 30 Aña di existencia di Museo Arqueologico ta un logro di henter Aruba!

DIA 20 di December 2011 nos ta mira bek riba un 'milestone' den historia di Aruba. Tabata 30 aña pasa cu un vision a bira realidad y a habri e Museo Arqueologico di Aruba na Zoutmanstraat 1 pa asina presenta Aruba su herencia rico na publico. No solamente pa Aruba esaki tabata algo grandi, e tabata alabes un di e prome museonan arqueologico den Caribe.

Siguiendo pasonan di pioneronan manera drs. Egbert Boerstra (q.e.p.d.) y di Sr. Evelino Fingal, un grupo di profesional y amigonan di Museo Arqueologico a sostene y guia e Museo den transcurso di e 30 añanan pa awe e ta un di esnan di mas bunita y renombre den nos region, un berdadero orguyo di nos pais.

